

安雅堂詩集

冊二

金瓶梅詞話

安雅堂未刻稿卷第二

萊陽 宋 琬 玉叔 著

七言古詩

挂劍臺

在張秋鎮

延陵季札賢公子腰下芙蓉淬秋水一片心期不忍寒蕭蕭隴樹虹霓紫歷聘諸侯未反命魚腸剗刃王僚死躬耕三讓宗家法吳邦不受輕如屣當時列辟尚權謀劍客縱橫仁義否君臣父子競相居谷風之刺徒爲耳公子深憂在萬古聊因死友扶人紀縞紵非無肸與僑千金獨向徐君委竭來酹酒想遺風荒臺半圯埋寒叢麒麟寂寞一坏土誰其樹之松柏桐人言墓草似干將轆轤鐔鼻將無同三十年來不復甲枯根或化爲蛟龍水湯湯兮風烈烈篝火黃昏讀殘碣金石有時銷此誼長不滅君不見交態紛紛等阡陌任昉門前無弔客

王中恬先生七十壽詩

具區澤畔烏衣巷孟陬之月星辰降石麟墜地信有神咳吐成珠氣如虹一朝

獻賦蓬萊宮是父是子拜舞同觀者咨嗟至尊歎桓家馬步何其工祕圖山下
神明宰歸來三徑滄桑改龍威丈人書獨窺皇甫先生宅還在蒼水使者乘星
輶再命而僂罔敢驕九牧知名爭執轡賤子何幸能聯鑣孤竹城邊吐胸臆官
梅閣下承顏色縱飲從教百榼傾登臨不假雙童力去歲曾探日觀峯裏糧未
得躡游踪吳門匹練老能識水曹但見青重重一餐沆瀣身逾健五枝爲餌青
精飯蒼松同拜大夫風黃菊還堪徵士伴絳縣編年甲子長鹿門夫婦敬相莊
百歲觥籌洛陽社一門羔雁太邱鄉大隱從來在衡泌翻笑商山輕此出醉呼
明月影成三倦舁藍輿吾其一午夜星橋沸管絃笙歌新譜白華篇漫從江左
誇義獻共說人間有偓佺

送李方山之溟南幕府

海內大兒孔文舉生平未得相爾汝湖上相逢驚我在剝啄到門無一語坐久
方言在豫章聞君遘禍如膺滂凶問紛紛未敢信可憐子敬人琴亡

君有弔子及王朴齋

詩

大招賡罷涕沾襟三竺烟巒喜共尋西泠雨後暮潮長南屏月落曉鐘沉李

君磊落世無匹昂藏七尺鬚眉氣酒酣不避武安侯落拓翻愁灞陵尉峭帆忽
向桐廬去從征萬里滇池路黃陵廟口鷓鴣飛諸葛壘邊猿狖度異姓諸王誰
最賢汾陽幕府銅柱邊已聞握髮禮縫掖會看聚米畫山川尉陀旣繫呂嘉馘
珠履雍容需上客羨君綵筆動星辰揮毫坐使三苗格臨岐送罷渺天涯一路
鶯啼楊柳花坐中有客善長笛爲君更奏漁陽摑

青山莊歌爲徐聲服太守作

徐侯昔爲二千石衙齋下瞰蛟龍宅三載飽看蜃市樓雙岐再秀漁陽麥解組
歸來何太早灑淚車前諸父老攜將五色丹崖石袖中磊落珠璣島君家別墅
號青山乃在九龍唐貢縹緲間烟波澹蕩芙蓉湖畫橋掩映茱萸灣長松萬笏
茅屋古白雲千疊柴門關中有一人兮紺髮而朱顏餐沆瀣弄潺湲乘赤鯉招
白鷗倚葛陂之龍杖兮舞萊綵之斑斕昔我扁舟向於越看竹肩輿坐林樾酒
徒歷落兩薛生狂歌醉臥長橋月別來叢桂近何如但言山巔水際添精廬科
頭日讀南華篇盥手自寫天竺書徐侯之樂樂只且四十不羨專城居君不見

隋苑離宮十有六荒臺滅沒眠黃犢又不見辟疆名園竟何處舟人指點紛無據蘇堤邂逅送春光峭帆直欲之炎方炎方山水信奇絕武夷九曲盤青蒼更到羅浮最高頂七十二峯遙相望此中亦有蓬萊閣岢峨或與東牟當君歸構亭山之陽安得畫手顧長康掃粉壁圖滄浪南繪番禺東扶桑奇樹若木與桄榔徐侯招我來栗里白飯青芻屬兒子野夫性懶怯奔走臥游但醉蘭陵酒

題王西樵三桐小像歌

誰擘高麗雪蠶紙繪出三桐勢相倚直幹高撐綠玉峯繁陰下覆烏皮几紫髯白袷瑯琊兒隱囊如意方搢頤揮手欲招朱鳳下髣髴已絙園客絲自言種此三十年其一小者纔及肩邇來離立近百尺菟裘回首心悽然愛汝十笏草堂靜篴奏塤吹一何盛牆東避世許我同風雨蕭蕭抱琴聽

寄懷姚經三司理建寧

君家羣從高陽里遏末封胡先後起黃門給事大中郎火攻屈指長誇爾才名藉甚洛陽都康莊千里羨騶駼相如車騎歸來盛卻買扁舟到鏡湖自荷長鑣

探五泄浣紗石上苔痕滅千峯萬閣共銜盃坐看秦望峯頭雪同游者誰孫子
荆南州老子真狂生曲阿太史好禪寂雄談飛辯何縱橫一旦存身在羅網素
交棄我如塵壤男兒急難誰復憐故人沉隔螺江上去年重到會稽山有客新
從九曲還言君念我不暫忘拔劍輟箸長三歎嗚呼此意渺千古知己堪悲越
石父子瞻磨蝎悔作人馬遷貨殖思爲賈羨爾平反有異聞持平不肯用深文
卓筆還成鐵笛賦褰帷並弔武夷君往往從之不能去離憂憑仗孫郎語開軒
話我再生緣樺燭三條應至曙

寄懷周伯衡憲副

憶昔渤海李學士上書侃侃論臧否南陽貴人爭欲殺先帝優容得無死妻孥
徒步東出關遠謫辰韓五千里平原賓客散如烟交態從來類如此周侯夕下
青瑣闥一片真誠血相視短衣匹馬踐嚴霜蕭蕭夜渡盧龍水姓名不遺關吏
知但道先生舊弟子送上氈車痛哭回觀者歛轍行者止我住北平近三載李
君累月書盈紙方知古道未嘗亡國無君子將何倚黨人賴有賈長頭董班高

義垂青史世上盡如曹蜍李志輩不鳴不躍徒爲耳思欲逢君一再拜冉冉征途改星紀困辱顛連安足論故態狂奴老尙爾安得馬當山下風共看匡廬千尺水

送孫無言歸黃山歌

憶昔虞山錢尙書裹糧一月黃山居洞壑遙連天子障巖扉舊是仙人廬白雲瀾漫似海水銀屋瓊樓或不如松柏已迷秦漢世日月想見鴻濛初我讀紀游未終卷移家便欲將雞犬一朝邂逅孫山人自言本是山中產柴荆一別滯蕪城故國松筠空在眼越禽代馬思依依欲歸不歸抱深赧今年還山計已就白石青谿齒堪漱親串相迎不相識婚嫁皆從出門後五畝雖荒尙可耕呼兒學種南山豆有時餘力及樵漁大男荷擔中男售山人醉我金叵羅請予爲作黃山歌四海交游各有贈傾箱倒笈何其多作者存亡半寥落黃山客子仍蹉跎卜居狐疑詹尹笑我龜旣厭勞義和答云廣陵盛才彥詞人墨客肩相摩倚棹徘徊未忍去離羣踽踽愁如何我聞此語知其故迴觴卻勸山人住他日重尋

戴安道免使相思渺烟樹

羅篁菴先生生日歌

有序

豫章羅老夫子望峻龍門名高虎觀西京天祿闡六籍之微言北面人
宗接一峯之正學金滕石室世傳永叔之文章璧潤珠圓

帝羨曲江之風度空馬羣於冀野收驂駟隸駟之材振鷺羽於橋門賡
玉瓚黃流之頌詵詵國子方依絳帳於陽城藉藉公卿俄餞青門之疏
傳黑頭歸隱冠懸神武之門白社招尋家近柴桑之里西山南浦長吟
帝子之高樓白下長干重啓謝公之別墅鑑湖一曲賀季真之軼事堪
誇繡幕雙鬟白太傅之風流再見茲值小春之月方開六袞之筵訣授
庚申親把洪厓之袂曆周甲子誰知絳縣之年楚楚琳琅盡是烏衣玉
樹紛紛鸞鶴銜來丹液瓊巵琬懷恩一顧願祝三多當年立雪深慚吾
道干城此日趨風幸接南豐几杖爲公起舞還吟池上之篇聽我陳詞
竊附巴中之調云爾

昔我應詔來京師鹽車局促無人知司業夫子據皋比學者宗爲韓退之河內薛公作祭酒講德之論中和詩鴻都諸生何濟濟公侯胄子聽箴規絃歌饗射用古法摩挲石鼓宣王碑是歲成均校多士公手予文稱絕奇橋門觀者衆如堵一鼓遂奪千人麾京兆禮闈果再捷硃珌爭價由波斯

章皇右文邁漢武網羅圖史陳尊彝戴憑談經累重席匡鼎說詩爲解頤風度無如張九齡太平宰相非公誰小子一官真拓落間關萬里雜羌氏當時執政頗驕刻浮雲蔽日空爾爲師也見機獨明決拂衣高臥西山陞扁舟時泛廣陵曲精廬沉在秦淮湄扶風帳內笙歌部花晨月夕常追隨西子湖邊侍函席丹顴綠髻橫軍持自言已得旌陽訣招予同採匡岑芝今年再拜蕪城下恰逢嵩嶽生申期登堂介壽者誰子康成弟子蘇瓌兒富貴神仙安可兼鄴翁自是冰霜姿東華軟塵高十丈何如五老峯下之茅茨聞公避喧往牛首籃輿共舁安敢辭欲向茅君借仙馭召令飛瓊倚曲雙成吹

贈鄭汝器歌

莆田宋珏
善八分書

近代八分復何有專家獨讓莆田叟作者紛紛祖唐隸臃腫支離轉麤醜鄭君
博物饒天姿書法遒勁多離奇老筆縱橫森劍戟尺幅光怪盤蛟螭大書徑尺
懸巖巖髮髯再見嶧山碑家藏圖書半秦漢陳倉石鼓宣王詩岫嶁傳疑夏王
禹之眾篆刻丞相斯縹緗卷帙各精好巖搜壑剔將無遺我來焚香肆展閱神
游三代觀鼎彝主人愛客出斗酒高齋日午桐陰移況復髯兄善豪飲醉揮三
百金屈卮君從壁上觀人醉獨踞匡牀作奇字潑墨淋漓四座驚咫尺蒼茫風
雨至昔我持節隴首經磨洗中郎邨閣銘會將什襲稱雙絕置向浮嵐暖翠亭

余家藏黃大癡山水曰
浮嵐暖翠圖因以名亭

香山讌集詩 有序

歲在丁未六月乙酉將由建業言反吳門懷吾土以登樓興悲王粲蒞
大邦而製錦有美馮君慕懷縣之風栽花譽滿鄴并州之誼投轄情深
喜熟客之何來無譏褊褊快嘉賓之畢集寧惜尊疊觀號香山栢柏識
青牛之氣橋環碧水芙蓉儼白鷺之洲爰命行廚釣金鱗而作鱸棹徵

童子倚玉砌以吹笙幕展青油宛渠渠之夏屋庀分翠蓋代曲曲之流觴正爾殷雷天外欲來山雨俄焉明月樽前忽散城霞左右涼颼不惜平頭羽扇浮沉朱李差宜散髮匡牀樹扶疎而黃鳥來歌波瀾灑而白鷗成隊統統羯鼓隔素幔以催花點點流螢伴銀燈而送客昔者南皮飛蓋因裁公讌之詩洎乎河朔傳盃厥有良辰之頌以主人之高韻如斯況景物之流連若此可無篇什以紀歲時羨今夕之陶然甘從金谷園中之罰倘他年之至止竊疑元都觀裏之桃云爾同游者陳幼木孝廉湯旌三進士柳公韓馬寅公崔季通王君貺茂才序其事者萊陽宋琬也

炎蒸偶過投金瀨火雲突兀如車蓋主人愛客不知疲臨流置酒成高會芙蕖花葉正田田習習香風滿衣帶楚姬十五曉奩開越女三千明鏡外南山之下殷其雷揮汗不飲愁尊疊須臾赤城暮霞起素娥流影無氛埃珠璣零落白鷺喜管絃嘈雜元蟬哀銀漏沉沉客竟醉玉山屹屹何由頽康成弟子陪游衍來

朝洗琰重開宴是時西北天如茶驚見涼飈掃飛電神女由來避灌壇風霆咫尺陰晴變角觝交陳父老觀街衢燈火兒童忤井梧旦夕報秋聲扁舟欲發闔閭城握手相看那忍別更捲荷柄作兕觥君家夾河善爲政雙鳧佇待朝神京卻憐道士無鵝換素壁猶堪書姓名

佟中丞匯白僻園觀姚伯右畫梅歌

南國梅花數袁墓絳雪瓊枝千萬樹秣陵城中吉祥寺古幹離奇世無二游人如蝶坐其下車馬笙歌到花謝我來步履長千里荷葉田田正初夏驚看素壁掃寒枝霜華綠萼紛相亞禿梢拂雲半已枯蛟龍屈曲怒且癰粉黛肯教巢燕污輕黃欲上游蜂鬚畫手曾聞楊補之近代無過關九思姚生自是餐霞客酒酣潑墨方淋漓亭亭斜影臨春水姑射仙人弄珠璣穠李夭桃空自妍一時頻首稱羣婢尤物從來貴棲託多君寫向平津閣孤亭面面碧瑯玕池光交映青田鶴主人醉客出新萸絲竹東山恣燕游據牀三弄桓伊笛不必重尋孫楚樓

送王古直之大名爲周起三太守書記

王郎家在錢塘郭楊柳臨湖起高閣門外偏多載酒人滑稽雄談恣歡謔一朝
結束遠行邁匹馬蕭蕭向河朔銜杯借問所從誰天雄太守開蓮幕勸君滿飲
緩離憂大匡山中我舊游霸跡銷沉五鹿在人烟稠疊二漳流閭左頻年苦征
稅南箕北斗困誅求來何暮哉二千石蒼生待爾抒良籌黃梅日夜西冷雨渺
渺孤帆隔烟樹懷古應過白馬津揮鞭何處黎陽渡此中詞客有盧栢松楸零
落穿狐兔式廬表墓主人恩苗裔若在尋遺賦未須灑淚向臨岐予亦依劉舊
有期翦燭定當蟋蟀夜泛月或在鸛鵲陂美酒從來數桑落十千一醉烏容辭
郡人交說岑公孝薦達敢誇魏無知

寄姚六康

學者讀書須讀史坐窮理亂知臧否但愁紙價洛陽高空使臨淵羨寒士朱門
絢帙競裝潢獵色漁聲安用此須臾散失隨雲烟補袍覆醬徒爲耳兩京監板
頗粗略數行以後丹鉛止近來剞劂數毛家校讎惜未精蒐羅兼載徒誇費兩
牛愆訛誰復分三豕南梁北齊編更陋譬如嘉穀紛糠粃乖謬相承千百年無

人筆削存公是姜生雅負春秋癖閉戶覃思卻車軌上溯馬班下沈范歎息歐
陽觀止矣刪繁滌穢匠心苦甫田有畔紛絲理蹇驢捆束走長安詞林動色公
卿喜何由薦達明光宮卻難流布咸陽市丹陽令尹綰綬初誓將薄俸謀經始
重構蕭家文選樓爰從兩史爲嚆矢吾儕豈乏桓君山高臺九仞需層累或曰
姚侯一何迂催科不肯施鞭捶臥閣惟知學蠹魚甑塵那得肥妻子旣無公府
之嚴檄又非水衡錢穀比胡爲乎孜孜矻矻窮年而不已姚侯大笑謝時人吾
亦不知其所以但言樂此不爲疲有書不讀何如燬我慕姚侯常下拜欲往從
之渺烟水摩挲雙眼待書成書成早寄青湖鯉

長歌贈陳其年

瑯琊兄弟耽詞賦法曹年少來瓜步東閣梅花召賓客閣外常盈幾雙屨座中
最愛陽羨生一榻高懸待徐孺考功瀟灑善長調屈指推君誇絕巧武塘學士
亟稱賞共把君文問君貌扁舟暫繫瓊花臺蒹葭歷亂芙蓉開半刺懷中猶未
出心知是君美且慙輕棹容與泛秋水狂歌氣欲吞長淮君家冠蓋滿京洛三

十年來莽蕭索青緇奕葉擅雕龍白眼何人識孤鶻屯田員外曉風詞秦川公
子登樓作丹陽少府頗好事搜剔蒼巖洗瘞鶴北固城頭聊共吟中泠泉水還
堪酌朔風千里撲行車歎息征人霜鬢華醉中莫折隋堤柳來歲同看鄧尉花

寄趙雍客

憶昔結交嚴給事綵筆憑陵千象緯作者七人余其一汎愛兼收爛羊冒論文

雅欲法周秦作賦相期宗漢魏坐中稱述及吾子精銳偏師使人畏不數同邑

江東生

羅隱

絕勝君家渭南尉

趙嘏

湖上飄零喜見君樽酒班荆愜素聞晚鐘共踏

南屏月曉色遙看天目雲醉後爲余開篋筍琅玕奇字青霞文戛擊鐘鏞還大
雅竟陵餘子徒紛紛風驅電邁鬼神泣豈惟旗鼓張吾軍旅雁沙鷗無定向菰
城臥病歎離羣藥裏沉綿疎玉琰枕藉君詩常在眼由來七發逾良醫二豎奔
逃去如剡雙鳬共羨使君來手板要章綬初綰才名藉甚尹翁歸輿論歡騰鄭
子產料得栽花滿路衢況復鶯聲方曉睨澱湖東上路非遙一葦曾聞不崇朝
相思相望轉愁絕扁舟欲往羞陽矯年來已厭鱸魚膾會須歸問故山樵尺書

若訪張融屋白鶴江頭有暮潮

題沈友聖虎邱夜宴圖

君不見宏農太守皇甫規折節下士如渴飢尺書遣謝趙元叔高風千載難攀
追漢陽顧公真御史青眼能交天下士繡衣按部五茸城驄馬將行且復止騎
旄前導吏人趨使君命駕東城隅造門執轡候良久沈生高枕臥菰蘆一笑登
堂但長揖觀者如山繞牆立交情真見古人風安問乘車與戴笠扁舟相送惜
離羣生公石上共論文騶馭停車立花外山僧秉燭向宵分快事驚傳作佳話
一時逸興堪圖畫鬚眉逼肖衣冠殊寫生疑是將軍霸瀟灑何須獬豸冠捫蘿
穿葛上層巒祭酒先生橫麈尾月明清嘯共馮闌方聞綵鷁沔川回何益長沙
鵬鳥災迴車自下羊曇淚白馬應需范式來我見此圖三歎息史魚不作悲遺
直婁東幸有典型存欲往從之無羽翼沈生痛哭知音稀三徑蕭然獨掩扉請
看世上軒車客只重黃金輕布衣

修竹篇爲筠士上人作